

20 onns Swisscom

Radunanza dals acziunaris

DA LUCAS DEPLAZES / ANR

■ **Dapi 20 onns exista Swisscom sco societad anonima. Sia posiziun sin la fiera da telecomunicaziun liberalisada è solida e stabila. Swisscom è preparada per la nova rait da transmissiun G5. Ils 1256 acziunaris han acceptà tut las propostas e confermà Hansueli Loosli sco president.** *Hansueli Loosli*, il president dal cussegl d'administraziun da Swisscom, ha regurdà al prim da schaner 1998. Quai è stà il mument che la politica ha dividì l'anteriura PTT en las duas interpresas «La Posta» e «Swisscom». Entant che La Posta è restada in manaschi da la confederaziun, è Swisscom vegnida surlaschada a la concorrenza internaziunala. 20 onns Swisscom munta era 20 000 collavuratur e collavuraturas che segireschan di e notg in servetsch public da telecomunicaziun en plain svilup e d'auta qualitat, ha punctuà Loosli. La concorrenza saja dira, ils custs ed ils pretschs èn sut squitsch. La svieuta netta dal concern è s'augmentada per 0,4% sin 11,7 milliardas francs. Il gudogn 2018 munta a 1,5 milliardas francs.

Il svilup tecnic sfrenà lubescha adina dapli pussaivladads da diever per ils consumers, quai che pretenda considerablas investiziuns per adattar la rait da transmissiun. L'onn 2018 ha Swisscom investì en Svzra 1,6 milliardas francs persunter. Ussa saja il martgà da telecomunicaziun sazià, ha constatà Loosli. La nova tecnica lubescha dentant d'investir

en novs products, en novas prestazius da servetsch.

Ferma posiziun

Swisscom posseda 60% dal martgà da la comunicaziun mobila cun 6,55 milliuns attatgs. Il dumber d'abunents da televisiun è s'augmentà per 3,5% sin 1,52 milliuns. Il dumber dals abunents da la rait fixa è dentant sa reducids per 2,7%. Actualmain disponan 3,6 milliuns chasadas da la nova tecnologia da telecomunicaziun (fibra da vaider). En intgins

vitgs ed en sis citads fa Swisscom emprovas cun la novissima tecnica da transmissiun: la tschintgavla generaziun G5.

L'autostrada da transmissiun

La novissima rait numnada G5 è l'autostrada da transmissiun e la premissa per la digitalisaziun futura, ha fatg attent Loosli. La digitalisaziun porta considerablas midadas sin il sector privat, public ed economic. Ella vegn a tangar tut ils secturs da nossa vita. Swisscom è vidlonder d'adattar sia rait da transmissiun. Las

frequenzas per il futur èn ussa repartidas. Loosli ha dentant admonì da betg surveillar las consequenzas a curta vista. Quai na saja negin motiv da dismetter ils smartphones actuals, fan attent divers purschiders. Er G5 vegnia anc a coexistar cun 3G e 4G.

La meglra rait dal mund

Swisscom dispona d'ina da las meglras infrastructures da telecomunicaziun dal mund, ha accentuà *Urs Schaeppi*, il schef operativ da Swisscom, e menziunà diver-

sas giudicaziuns internaziunalas. Swisscom vul restar vinavant il numer in sin il martgà, ha sincerà il ceo a chaschun da la radunanza dals acziunaris a Basilea. Actualmain disponan var 90% da las chasadas svizas d'in indriz da transmissiun a spectrum larg. Quasi mintga di vegn ina vischnanca colliada cun la tecnica nova.

Buna rendita

Las aczias da Swisscom èn quotadas tar SIX Swiss Exchange. Per la fin da l'onn passà ha il chapital da Swisscom già ina valuta da 24,3 milliardas francs e purtà ina dividenda da 22 francs per aczia, quai munta ina rendita da 4,2%. Per l'onn current spetga Swisscom vinavant in svilup positiv. Durant ils ultims 20 onns ha Swisscom distribuì in gudogn da 32 milliardas francs. La confederaziun tegn cun var 51% la maioritad da las aczias. Quella maioritad impedescha che Swisscom va en mauns esters. *Renzo Simoni*, l'anteriur schef da AlpTransit Gotthard AG, represchenta dapi dus onns ils interess da la confederaziun.

Indemnisaziun

Per il cussegl d'administraziun han ils acziunaris lubì ina summa da 2,5 milliuns francs, sco l'onn passà. Per ils commembers dal concern stattan a disposiziun almain 5,3 milliuns francs, en cas che las finamiras vegnan ademplitas 8,4 milliuns, quella summa po vegnir augmentada fin a 9,7 milliuns francs. Il salari dal ceo Schaeppi resta cun 1,8 milliuns francs sin in nivel dals ultims onns.



Dapi 20 onns exista Swisscom sco societad anonima. Sia posiziun sin la fiera da telecomunicaziun liberalisada è solida e stabila.

KEYSTONE